

## So ännert sich die Welt

Gestern moie um elf habb ichs Kättche uff de Gass getroffe unn wies so geht, hawwe merr e gonz Zeit zesomme gestonne unn geschwätzt.

Honnes, hotts Kättche gesacht, gestern warn merr uff de Wissemiehl, doch bevor merr dort enn Hondkäs gesse hawwe, sinn merr erstemol die Trepp zu de Annakapell hochgelaafe unn sinn dann weidergonge bis zu dem neie Eiseboom. Also ich muss derr saache, dess Ding gefällt merr. De Schorsch iss joo iwverhaupt nit mettem oiverstonne, awwer mir gefällt der Boom. Unn aach de Veechel gefällder, weil doo hawwe schunn e paar Starn druffgesotze. No ja, die finne uff dem Boom joo koo Höhl ferr e Nest ze baue, awwer glaab merr, wenn e Zeit erum iss, dann werdd enn Storch von de Deponie doo druff baue, genauso wie die Störch in Schierstoo ihr Nester uff die Masde von de Iwwerlondleidunge druffgebaut hawwe. Ferr soon Storch iss dess sicher egal, ob so enn Boom aus Holz odder aus Eise iss, Hauptsach er iss hoch genuch, moonsde nit?

Ich habb gegrinst. Dess kennt schunn soi. Hosde onn dem Boom gonz owwe die schwarze Dinger geseh?

Ja, sächts Kättche, unn dess sinn so Solarzelle. Mir hott doi Fraa verzählt, die dete sovill Strom mache, dass so e Art Tonbond im Boom laafe kennt unn doo det merr heern, wie die Blätter rausche unn wie die Veechel singe. Aach doodriwwer hadd de Schorsch als was ze meckern. Von weeche meckern, dess muss ich derr verzähle. Letzt Woch warn merr driwwe in Rhoihesse, doo gibt's joo vill so Windräder, was glaabsde was doin ahle Kumpel doo gebrewelt hott. Verspaschelung wär dess unn dass dorch die Windflüchel vill Veechel zu Tod kumme dete. Ich konnts nimmi heern unn habb gesacht: Schorsch, fahr emol neue hie. Unn dann habb ich gesacht: Jetzt fahrn merr hoom, stelles Audo ab unn fahrn iwverhaupt nie mehr. Doo frächter: Ei warum dann, Kättche? Unn ich gebbem zur Antwort: Weil aach von de Audos Veechel dodgefahrn werrn, desweeche.

Unn, habb ichs Kättche gefroocht, was hotter doo druff gesaacht?

Dess Kättche hott gelacht. Ei was werrder schunn gesacht hawwe? Dess iss doch gonz was onnerst, hotter gesacht unn iss weidergefahrn. Doo siehdsde mol wies iss, was merr selwer mächt iss immer was onnerst als dess was onnern mache. Jeder will gesund Luft, awwer Windräder? Nein danke!

Ich musst dann aach emol lache. Kättche, du bist joo heit gonz schee in Fahrt.

Ach, sächst Kättche, de Schorsch unn ich sinn deletz weechener gonz onnern Sach onnenonner kumme. Er hott gesacht, mir fahrn nit in die neue Länder, weiler gelese hott, doo wärn jetz widder Wölf. Moonsde ich will gefresse werrn, hotter gesacht. Doo habb ich emm dess neie Märche vom Rotkäppche erzählt, willsdes emol heern?

Ich habb abgewehrt. Kättche, ich will heit noch hoom. Außerdem kenn ichs, wie de Wolf die Großmutter unns Rotkäppche gefresse hott.

Naa, naa, sächst Kättche, dess neie Märche gieht so: Wie nun Rotkäppchen in den Wald kam, begegnete ihm die Zecke. Rotkäppchen wusste aber nicht, dass die Zecke ein böses, böses Tier war, deshalb hatte es keine Furcht – unn so weider unn so weider. Unn am End heeßts: Und weil sie geimpft worden war, lebte sie fröhlich bis an ihr seliges Ende.

Kättche, habb ich gesacht, du host Recht, die Welt unn die Märcher ännern sich. Ess gibt jetz Beem aus Eise unn ess sinn die Zecke, die oom beiße unn nimmi die Wölf.

Eiern Honnes